

兩漢三國學案

六

Z121.6
1
(14)

兩漢三國學案總目

卷一之二

周易

卷三之四

尚書

卷五之六

詩

卷七

禮樂

卷八之九

春秋

卷十

論語 孝經 孟子 爾雅

卷十一

明經文學列傳

兩漢三國學案卷之六

唐晏學

詩

轅固齊人也以治詩孝景時爲博士與黃生爭論於上前黃生曰湯武非受命乃殺也固曰不然夫桀紂荒亂天下之心皆歸湯武湯武因天下之心而誅桀紂桀紂之民弗爲使而歸湯武湯武不得已而立非受命爲何黃生曰冠雖敝必加於首履雖新必貫於足者上下之分也今桀紂雖失道然君上也湯武雖聖臣下也夫主有失行臣不正言匡過以尊天子反因過而誅之代立南面非殺而何固曰必若云是高皇帝代秦卽天子位

非邪於是上曰食肉不食馬肝未爲不知味也言學者
毋言湯武受命不爲愚遂罷竈太后好老子書召問固
固曰此家人言耳太后怒曰安得司空城旦書乎廼使
固入圜擊箠上知太后怒而固直言無辜廼假固利兵
下固刺箠正中其心箠應手而倒太后默然無以復辜
後上以固廉直拜爲清河太傅疾免武帝初卽位復以
賢良徵諸儒多嫉毀曰固老罷歸之時固已九十餘矣
公孫宏亦徵側目而事固固曰公孫子務正學以言無
曲學以阿世諸齊以詩顯貴皆固之弟子也昌邑太傅
夏侯始昌最明自有傳

夏侯始昌

見大夏侯尚書

董仲舒

見春秋胡毋董氏公羊

春秋繁露說詩

坎坎代輻兮彼君子兮不素餐兮先其事後其食謂治身也

他人有心予忖度之此言物莫無鄰察視其外可以見其內也

詩曰嗟乎君子無恆安息靜共爾位好是正直神之聽之介爾景福正直者得福也不正者不得福此其法也以詩爲天下法矣何謂不法哉

詩云飲之食之教之誨之先飲食而後教誨謂治人也

文王受天命而王天下先郊乃敢行事而興師伐崇其詩芃芃棫樸薪之標之濟濟辟王左右趨之濟濟辟王左右奉璋奉璋峩峩髦士攸宜此郊詞也已受命而王必先祭天乃行事文王之伐崇是也詩曰濟濟辟王左右奉璋奉璋峩峩髦士攸宜此文王之郊也

王赫斯怒爰整其旅當是時紂爲無道諸侯大亂民樂文王之怒而詠歌之也

詩云不識不知順帝之則言弗能知識效天之所爲云爾

詩云文王受命有此武功旣伐于崇作邑于豐樂之風也

詩云不愆不忘率由舊章舊章者先聖人之故文章也率由各有修從之也此言先聖人之故文章者雖不能深見而詳知其則猶不失其美譽之功矣

周宣王時天下大旱歲惡甚王憂之其詩曰倬彼雲漢昭回于天王曰嗚呼何辜今之人天降喪亂饑饉薦臻靡神不舉靡愛斯牲珪璧旣卒寧莫我聽早旣

太甚蘊隆蟲蟲不殄禋祀自郊徂宮上下奠瘞靡神
不宗后稷不克上帝不臨耗斁下土寧丁我躬宣王
自以爲不能乎后稷不中乎上帝故有此災

是非之正取之逆順逆順之正取之名號名號之正
取之天地謫而效天地者爲號鳴而命者爲名名號
異聲而同本皆號名而達天意者也詩曰惟號斯言
有倫有迹 詩云侯服于周天命靡常言天之無常
予無常奪也 詩云天難諶斯不易爲王夫王者不
可以不知天知天詩人之所難也天意難見也其道
難理 天道無二一而不二者天之行也人孰無善

善不一故不足以立身治孰無常常不一故不足以
致功詩云上帝臨汝無二爾心知天道者之言也

詩曰有覺德行四國順之覺者順也王者有明著之
德行於世則四方莫不響應風行善於彼矣 詩云

唯此文王小心翼翼昭事上帝允懷多福多福非謂
人也事功也謂天之所福也 武王受命作宮邑於

鄘 聖人事明義以炤耀其所闇故民不陷詩云示

我顯德行先王顯德以示民故民樂而歌之以爲詩
悅而化之以爲俗而不令而自行不禁而自止 詩

云無德不報故成王祭周公以白牡上不得與天子

同色下有異於諸侯以爲報德之禮 德莫大于和
而道莫正于中中和者天地之美德達理也聖人之
所保也詩云不剛不柔布政優優非中和之謂與

后蒼字近君東海郟人也事夏侯始昌始昌通五經蒼
亦通詩禮爲博士至少府授翼奉蕭望之匡衡奉爲諫
大夫望之前將軍衡丞相衡授瑯邪師丹伏理旂君頴
川滿昌君都君都爲詹事理高密太傅家世傳業丹大
司空自有傳由是齊詩有翼匡師伏之學滿昌授九江
張邯琅邪皮容皆至大官徒眾尤盛

蕭望之字長倩東海蘭陵人也徙杜陵家世以田爲業

至望之好學治齊詩事同縣后倉且十年以令詣太常
授業復事同學博士白奇又從夏侯勝問論語禮服京
師諸儒稱述焉是時大將軍霍光秉政長史丙吉薦儒
生王仲翁與望之等數人皆召見先是光旣誅上官桀
等吏民當見者露索去刀兵兩吏挾持望之獨不肯聽
自引出閤曰不願見吏牽持匈匈光聞之告吏勿持旣
至前說光以周公吐握之禮光獨不除用望之而仲翁
等皆補大將軍史三歲間至光祿大夫望之以射策甲
科爲郎署小苑東門候仲翁從倉頭廬兒下車趨門傳
呼甚寵顧謂望之曰不肯錄錄反抱關爲望之曰各從

其志大將軍光薨子禹復爲大司馬地節三年京師雨
雹望之因是上疏願賜清閒之宴口陳災異之意宣帝
自在民間聞望之名曰此東海蕭生邪下少府宋畸問
狀無有所諱望之對以爲春秋昭公三年大雨雹是時
季氏專權卒逐昭公鄉使魯君察於天變宜無此害宜
躬萬幾選同姓舉賢材以爲腹心與參政謀如是則庶
事理公道立姦邪塞私權廢矣奏對天子拜望之爲謁
者累遷諫大夫歲中三遷官至二千石其後霍氏竟謀
反誅望之寢益任用宣帝察望之明經持重論議有餘
材任宰相欲詳試其政事復以爲左馮翊望之從少府

出爲左遷恐有不合意卽移病上聞之使侍中金安上
諭意曰所用皆更治民以考功故試之於三輔非有所
聞也望之卽視事是歲西羌反遣後將軍征之京兆尹
張敞請令諸有罪非盜受財殺人及犯法不得赦者皆
得以差入穀贖罪事下有司望之與少府李彊議以爲
民函陰陽之氣有仁義欲利之心在教化之所助堯在
上不能去民欲利之心而能令其欲利不勝其好義也
雖桀在上不能去民好義之心而能令其好義不勝其
欲利也故堯桀之分在於義利而已道民不可不慎也
今欲令民量粟以贖罪如此則富者得生貧者獨死是

貧富異刑而法不一也政教一傾雖有周召之佐恐不能復古者臧於民不足則取有餘則予詩曰爰及矜人哀此鰥寡上惠下也又曰雨我公田遂及我私下急上也戶賦口歛以贍其困乏古之通義陛下布德施教教化旣成堯舜亡以加也今議開利路以傷旣成之化臣竊痛之於是丞相魏相御史大夫丙吉亦以爲羌虜且破轉輸畧足相給遂不施敝議後遷御史大夫以不奉法自修踞慢不遜攘受所監臧二百五十以上左遷太子太傅宣帝寢疾選大臣可屬者引外屬侍中樂陵侯史高太子太傅望之少傅周堪至禁中拜高爲大司馬

車騎將軍望之爲前將軍光祿勳堪爲光祿大夫皆受
遺詔輔政領尙書事孝元卽位望之選白宗室明經達
學散騎諫大夫劉更生給事中與侍中金敞並拾遺左
右四人同心謀議勸道上以古制多所欲匡正上甚鄉
納之初宣帝不甚從儒術任用法律中書令宏恭石顯
久典樞機明習文法亦與車騎將軍高爲表裏不從望
之等望之以爲中書政本宜以賢明之選自武帝游宴
後庭故用宦者非國舊制又違古不近刑人之義白欲
更置士人繇是大與高恭顯忤恭顯令鄭朋華龍告望
之等謀欲罷車騎將軍疏退許史狀候望之出休日令

上之事下宏恭望之乃下廷尉免爲庶人後數月賜爵
關內侯給事中朝朔望會望之子伋上書訟望之前事
顯等因白帝發執金吾車騎馳圍其第望之自殺

按蕭望之儒者也而天性忤刻害人故始進則殘
霍氏少達則殺韓延壽再進則讒丙吉計其平生
宣帝詔所云敖慢不遜者足以盡之其爲恭顯所
搆有天道焉易曰無平不頗無往不復諒哉大抵
齊詩一派人才不盛而又多詭辟之行蓋本出衍
爽之餘失孔門之旨其不能盛宜也

翼奉字少君東海下邳人也治齊詩與蕭望之匡衡同